

فريق التفريغ بموقع الطريق إلى الله

يقدم

برنامج قعدة شباب

لولا أن ثبتناك

(باللهجة المصرية)



لفضيلة الشيخ: محمد الشيخ

رابط المادة: <https://way2allah.com/khotab-item-169645.htm>

اتكلمنا في القعدات بتاعتنا عن حاجات كثير، اتكلمنا عن بداية الطريق، واتكلمنا عن خطوات عملية، واتكلمنا عن حاجات تساعد في طريق الهدية أننا نبدأ فعلاً نأخذ خطوات إيجابية في رحلة السير إلى الله - عز وجل -،

لكن عايزين النهاردة نتكلم برضه في موضوع مختلف شوية، اللي هو إزاي بقى اللي احنا اتكلمنا فيه أقدر أستمر عليه وخصوصاً كمان فيه مسألة أن أحياناً بيحصل عندي هبوط إيماني، بالمصطلح الشرعي اللي احنا قولناه الفتور.

تجنب الوقوع في الفتور في رحلة السير إلى الله

النبي -صلى الله عليه وسلم- يقول حديث جميل أوي -صلى الله عليه وسلم-: "ما من القلوب قلبٌ إلا وله سحابةٌ كسحابة القمر، بينما القمر يُضيءُ إذ علته سحابةٌ، فأظلم، إذ تجلّت" حسنه الألباني، تخيل كده القمر عامل إزاي مضى، لما بتيجي عليه سحابة إيه اللي بيحصل؟ بيظلم، طيب أنا برضه أحياناً بقى في رحلة السير إلى الله -عز وجل- عندي إضاءة إيمانية على الطريق لربنا -سبحانه وتعالى-، طب أحياناً بيحصل لي فتور في رحلة السير إلى الله بيظلم القلب، يظلم الإيمان في رحلة السير إليه -سبحانه وبحمده-، إزاي أبدأ أشغل على النقطة دي بحيث إن أنا أكمل في الطريق وأنا عامل حساي إن أنا مقعش في الفتور أو متماداش لدرجة أن هو يقلب معايا بانتكاس و-العياذ بالله-.

شدة تقلب القلب

فيه حديث مرعب أوي وهو حديث النبي -صلى الله عليه وسلم-، وهو يشبه قلب الإنسان، فالنبي -صلى الله عليه وسلم- يقول: "مثل القلب قلب ده عامل زي إيه؟ مثل الريشة تقلبها الرياح بفلاة" صححه الألباني، يعني تخيل في صحراء فيه عاصفة وفيه ريشة في وسط الهواء ده فالريشة بتلف، يقول لك أن قلب الإنسان عامل زي الريشة دي، بيتقلب كثير جداً، وبسرعة، يعني تلاقية النهاردة الصبح إيمانياته عالية جداً في السماء، بالليل إيمانياته في الأرض بيتقلب بسرعة جداً، بشكل فجائي وبتقلب كثير. فإن الواحد بينزل ويطلع ويتقلب، ويروح ويجي ده هو حديث النبي -صلى الله عليه وسلم-، وده تشبيه النبي -صلى الله عليه وسلم- للقلب بالريشة، والنبي -صلى الله عليه وسلم- شبه القلب بالقدر إذا اشتد غليانه، عشان كده كان سيدنا المقداد لما يروي حديث الريشة ده، فكان يقول: فما أمنت على أحد بعدما سمعت من رسول الله -صلى الله عليه وسلم-.

الثبات لا يكون إلا من الله - سبحانه وتعالى -

- سبحانه الله - لما نيجي نشوف الأصل اللغوي لتسمية كلمة القلب، من كثرة التقلب، عشان كده نجد كثير من دعاء النبي - صَلَّى اللهُ عَلَيْهِ وَسَلَّمَ - اللهم يا مقلب القلوب ثبت قلبي على دينك، ده مين النبي - صَلَّى اللهُ عَلَيْهِ وَسَلَّمَ -، لما نيجي نشوف دعاء جميل أوي في القرآن ربنا بيعلمه لنا إن احنا إزاي بنقول "رَبَّنَا لَا تُرِغْ قُلُوبَنَا بَعْدَ إِذْ هَدَيْتَنَا وَهَبْ لَنَا مِنْ لَدُنْكَ رَحْمَةً ۗ إِنَّكَ أَنْتَ الْوَهَّابُ" آل عمران: ٨، احنا محتاجين أن من وسط هذا القلب اللي الطبيعي أنه بيتقلب في زيادة ونقص وحال كده وحال كده ودي طبيعته أصلاً، فهو مش هيثبت على هذا الإيمان إلا بالاستعانة بالله - سبحانه وتعالى - .

ربنا اللي بثبتك فتسأل مقلب القلوب أن يثبت قلبك على دينه، ويصرف قلبك على طاعته، ولا يزيغ قلبك بعد الهداية، مفيش بشر فعلاً يقدر يثبت قلبه، القلوب بين إصبعين من أصابع الرحمن يقلبها كيف يشاء.

يجب أن ننتبه لقلوبنا

- سبحانه الله - حتى لما النبي - عليه الصلاة والسلام - قال: "تُعْرَضُ الْفِتْنُ عَلَى الْقُلُوبِ فَدِه يَخْلِي الْإِنْسَانَ بِيَقَى مَرْكَر مَع قَلْبِه أَنْ دِه الْمَكَانِ اللَّي الْفِتْنَةُ بَتَتَعْرَضُ عَلَيْهِ عَرَضُ الْحَصِيرِ عُوْدًا عُوْدًا، عُوْدًا عُوْدًا يَعْنِي لَكْثَرَةُ أَوْ عُوْدًا عُوْدًا يَعْنِي مَتَكَرَّرَةٌ فَأَيُّ قَلْبٍ أَشْرَبَهَا نُكَيْتَتْ فِيهِ نُكَيْتَةُ سَوْدَاءٍ، وَأَيُّ قَلْبٍ أَنْكَرَهَا نُكَيْتَتْ فِيهِ نُكَيْتَةُ بِيضَاءٍ، حَتَّى يَصِيرَ الْقَلْبُ أَيْضًا مِثْلَ الصَّفَا، لَا تَضُرُّهُ فِتْنَةٌ مَا دَامَتِ السَّمَاوَاتُ وَالْأَرْضُ، وَالْآخِرُ أَسْوَدٌ مُرْبِدًا كَالْكُوزِ مُجْحَبًا، لَا يَعْرِفُ مَعْرُوفًا، وَلَا يُنْكِرُ مُنْكَرًا، إِلَّا مَا أَشْرَبَ مِنْ هَوَاهُ" صححه الألباني، فكل واحد مننا محتاج أن هو يبقى منتبه لقلبه، لأن ده محل نظر ربنا - سبحانه وتعالى -، المكان اللي الفتنة بتصيبه، فكل ما كان الإنسان منتبه للقلب كل ما كان ده أدعى أن هو يبقى عنده يقظة في الطريق وميقعش إن شاء الله.

كيف أفرق بين الفتور الطبيعي والفتور الذي يؤدي إلى الانتكاس

- سبحانه الله - طب أنا بالنسبة لي صراحة عندي أنا كحد نفسه يقرب من ربنا - سبحانه وتعالى - فيه إشكالية كده أحياناً بتبقى عارضة عندي اللي هو الفرق ما بين إن أنا إزاي النبي - صَلَّى اللهُ عَلَيْهِ وَسَلَّمَ - بيقول: "إِنَّ لِكُلِّ عَمَلٍ شِرَّةً وَإِنَّ لِكُلِّ شِرَّةٍ فِتْرَةً فَمَنْ كَانَتْ شِرَّتُهُ إِلَى سُنَّتِي فَقَدْ أَفْلَحَ وَمَنْ كَانَتْ شِرَّتُهُ إِلَى غَيْرِ ذَلِكَ فَقَدْ هَلَكَ" صحيح ابن حبان، إزاي أنا أقدر أحدد مسألة الفرق ما بين الفتور؛ أن ده عارض طبيعي في السير إلى الله - عز وجل -، كما قال النبي - صَلَّى اللهُ عَلَيْهِ وَسَلَّمَ -، وما بين إن ممكن الفتور ده يوصلني لحالة من حالات الانتكاس و-العياذ بالله-.

الفرق بين الفتور السلبي والفتور الإيجابي

- سبحانه الله - واحنا بنتكلم مع بعض، لقيت أن بعض الناس اللي اتكلموا في المعاني دي وفرقوا ما بين حاجتين، قالوا أن فيه فتور إيجابي، اللي هو الفتور الطبيعي اللي النبي - صَلَّى اللهُ عَلَيْهِ وَسَلَّمَ - قال عليه في الحديث يبقى إذا أن

طبيعي جداً أن يحصل لنا فتور، طيب فيه رواية ثانية عن الإمام أحمد يقول: **"ومن كانت فترته إلى المعاصي فذلك الهالك"**، ده بقى اللي هو إيه الفتور السليبي و-العباذ بالله-، أن أنت لما يحصل لك حالة إيمانية قليلة تبدأ تفتقر عن الأعمال إيه اللي بيحصل؟ مترجعش بقى أن أنت تقتصد في سنة النبي -صلى الله عليه وسلم- وتثبت عليك الثوابت والأعمال الإيمانية اللي كانت بتعملها لا، تلاقيك بتقع في معاصي والعباذ بالله.

أصعب أنواع الانتكاس هو انتكاس المنافقين

وحد تالت قال أن فيه فتور شبه دائم سلمي، أن يبقى حالك مش هو الأكثرية اللي دايمة عليه هو حالة الطاعة، ده بالعكس يبقى حالك أكثرية حالة المعصية ويبقى فيه فترات بس بسيطة يبقى دي حالة الطاعة اللي أنت بتكون عليها، وطبعاً أصعب أنواع الفتور وده اللي ربنا -سبحانه وتعالى- يعافينا ويصرف عنا ولا يبتلينا فيه هو فتور المنافقين، اللي هو أنت بتظهر شيء وتبتطن عكسه، بتروح للصلاة وأنت كسلان كما قال ربنا -سبحانه وتعالى- عنهم **"وَإِذَا قَامُوا إِلَى الصَّلَاةِ قَامُوا كُسَالَى يُرَاءُونَ النَّاسَ"** النساء: ١٤٢، -والعباذ بالله- احنا مش عايزين نوصل للحتة دي في مسألة الفتور، ونقطة مهمة جداً في مسألة أن العلماء لما جم اتفرقوا ما بين الفتور وما بين الانتكاس، أن الفتور ده فتور العزيمة، أن أنت مش قادر تكمل معندكش عزم عشان تكمل على طريق الطاعة، أما الانتكاس هو انتكاس القصد و-العباذ بالله- أن أنت معدتش عايز الطريق ده.

معدتش عايز الناس دي، معدتش عايز أعمل الأعمال دي، و-العباذ بالله-، فدي طول ما أنت على مسألة القصد ومسألة فتور الأعمال، أنت إن شاء الله بإذن الله تكون ناجي في الطريق إلى الله -عز وجل- وخذ بالك متغيرش وجهتك وتعرض حتى لا يُعرض الله -سبحانه وتعالى- عنك.

من الحاجات اللي لازم نأكد عليها دائماً نقطة التصورات المثالية الوهمية عن الالتزام، اللي بتحبط ناس كثير جداً، يعني فيه ناس بتبقى معتقده إن أنا لما أقول أنا استقمت أو أنا التزمت خلاص يبقى أنا دائماً همتي عالية، أنا دائماً في الطاعات والعبادات وهكذا، فبنقول أن ده تصور وهمي ومثالية كاذبة بتضر صاحبها ليه بقى؟ اسمع عن الإيمان من النبي -صلى الله عليه وسلم-، لما النبي -صلى الله عليه وسلم- يعلمنا أن الإيمان بيزيد وينقص وإن ده شيء طبيعي، لما تلاقي النبي -صلى الله عليه وسلم- يقول: **"إِنَّ الْإِيمَانَ لَيَخْلُقُ فِي جَوْفِ أَحَدِكُمْ كَمَا يَخْلُقُ الثَّوْبُ، فَاسْأَلُوا اللَّهَ تَعَالَى أَنْ يُجَدِّدَ الْإِيمَانَ فِي قُلُوبِكُمْ"** صححه الألباني، يبقى احنا يا جماعة مش عايزين تصورات مثالية زائفة.

يعني على سبيل المثال، مش معنى أن داعية أو شخص ملتزم بينشر حاجات دعوية وأنشطة، معناها أن الناس دي مبتعش أن الناس دي ما بتخطأش، إن الناس دي دائماً همتها في السماء، فده تصور خاطيء بيخلي أن لما أي حد يقع أي واقعة أو بنت تقع في ذنب أو في فترة إيمانها يفتقر تقول أنا ضعت أنا انتكست، أنا هلكت، فلا، بنقول أن النبي -صلى الله عليه وسلم- كان تعامله مع الأمور دي يا جماعة ده الطبيعي في هذا القلب المتقلب أن الإيمان بيزيد وينقص،

طب نستسلم؟ لا نعمل إيه؟ فسلوا الله أن يجدد الإيمان في قلوبكم، فزي ما قلنا المرة اللي فاتت دعاء اللهم يا مقلب القلوب ثبت قلبي على دينك، وربنا لا ترغ قلوبنا واللهم جدد الإيمان في قلوبنا.

ما معنى الحور؟

النبى -صلى الله عليه وسلم- كان يقول: اللهم إني أعوذ بك من الحور بعد الكور، إيه الحور ده؟ عارف قول الله - سبحانه وتعالى- **"إِنَّهُ ظَنَّ أَنْ لَنْ يَحُورَ"** الانشقاق: ١٤، الحور هو تبدل الحال من حال إلى حال، يعني أنت كنت في حالة معينة فتبدلت، واحد كان مؤمن فتبدل إلى الكفر و-العياذ بالله-، واحد كان طائع فتبدل إلى معصية، فالنبى - عليه الصلاة والسلام- كان دائماً يستعيذ، اللهم إني أعوذ بك من الحور بعد الكور، خايف من الوضع ده، أن هو يفضل دائماً قلبه حاضر إن أنا يارب مش عايز إن أنا الحاجة الكويسة اللي أنا عليها دي إن أنا أحمدها أو إن أنا أحور عنها.

كيف لا أقع في مسألة الانتكاس؟

إيه اللي أقدر أمشي عليه أو أعمله عشان أبدأ آخذ بالي من الفتور أو مقعش في مسألة الانتكاس و-العياذ بالله-؟ ممكن نبدأ بتصحيح التصورات، يعني هو ممكن يكون تصور غلط عند الإنسان فكرة غلط، فالفكرة دي تكون سبب أن هو و-العياذ بالله- يترك الطريق، أو إن هو يبأس ويجيله حالة من الفتور.

التصور الخاطيء عن الطاعات

إن الإنسان يكون عنده تصور خاطيء عن العبادة، بنت من البنات سمعت قصتها هي كانت تحفظ قرآن، وراحت لدار معينة بتحفظ، وهي كان هدفها أن هي تختم في سنة واحدة بس، عندها همة عالية، فلما راحت عرفت أن خطة الدار في الختم ثلاث سنين، فراحت سايه الدار وقالت لا أنا عايزة دار ثانية بتخلص في سنة، البنت بتحكي القصة بعد خمس سنين ومحفظتش حاجة من القرآن، فأحياناً يبقى الواحد عنده خطة وتصورات عالية، فلما بيصطدم بالواقع أو بيلاقى أن الموضوع أقل، يقع، هو عنده تصور إما أنا هعمل حاجة كاملة وإما مش هعمل خالص.

الاعتدال من سنّة النبي -صلى الله عليه وسلم-

فالنبى -عليه الصلاة والسلام- كان بيعالج التصور ده، لما الصحابة سألوا عن عبادة النبي -عليه الصلاة والسلام-، فكأنهم تقالوها، **"إِنَّ رَهْطًا مِنَ الصَّحَابَةِ ذَهَبُوا إِلَى بَيْتِ النَّبِيِّ يَسْأَلُونَ أَزْوَاجَهُ عَنْ عِبَادَتِهِ فَلَمَّا أُخْبِرُوا بِمَا كَانَتْمْ تَقَالُوهَا أَيْ: اعْتَبَرُوهَا قَلِيلَةً ثُمَّ قَالُوا: أَيْنَ نَحْنُ مِنْ رَسُولِ اللَّهِ وَقَدْ غَفَرَ اللَّهُ لَهُ مَا تَقَدَّمَ مِنْ ذَنْبِهِ وَمَا تَأَخَّرَ؟ فَقَالَ أَحَدُهُمْ: أَمَا أَنَا فَأَصُومُ الدَّهْرَ فَلَا أَفْطِرُ وَقَالَ الثَّانِي: وَأَنَا أَقُومُ اللَّيْلَ فَلَا أَنَامُ وَقَالَ الثَّلَاثُ: وَأَنَا أَعْتَزِلُ النِّسَاءَ** احنا ممكن نسمع أن ده بطولة، واحد يقول لك يا عم أنا هصوم مش هفطر، الثاني هصلي طول الليل، الثاني أنا خلاص هعتزل النساء وأعيش حياتي في الرهبانية النبي -عليه الصلاة والسلام- مسمحش بده، فلما بلغ ذلك النبي بين لهم خطأهم وعوج طريقهم

وقال لهم: **إِنَّمَا أَنَا أَعْلَمُكُمْ بِاللَّهِ وَأَخْشَاكُمْ لَهُ وَلَكِنِّي أَقَوْمٌ وَأَنَا مُ وَأَصُومُ وَأَفْطِرُ وَأَتَزَوَّجُ النِّسَاءَ فَمَنْ رَغِبَ عَن سُنَّتِي فَلَيْسَ مِنِّي** صححه الألباني. فهذه سنتي؛ الهدى الاعتدال الاتزان.

يجب أن يكون هناك توازن في كل شيء

سيدنا عبد الله بن عمرو بن العاص -رضي الله عنهما- كان عنده همة عالية جداً -سبحان الله- في العبادة -رضي الله عنه- كان صيام طول النهار وقيام طول الليل، فلما سيدنا عمرو بيتفقد زوجته، فقالت والله ده راجل صالح، نعم العبد، سيدنا عمرو اشتكى للنبي -عليه الصلاة والسلام-، والنبي -عليه الصلاة والسلام- عدل التصور ده عند سيدنا عبد الله بن عمرو، قال إن لزوجك عليك حقاً وإن لبدنك عليك حقاً وإن لربك عليك حقاً فأعطي كل ذي حق حقه، فالإنسان يكون عنده توازن اللي النبي -عليه الصلاة والسلام- علمه لنا في السنة.

أحياناً يخرجنا الشيطان من الدين من باب الإفراط

ابن القيم في إغاثة اللهفان من مصائب الشيطان اتكلم في نقطة خطيرة جداً وهي أن الشيطان يُشام النفس، هو عارف أن الناس مش زي بعضها، فيبلاقي أن فيه نفس بتميل إلى التفريط وأنها تفرط في الأمور، فيأخذها من الجانب ده ويساعدها في أنها تخرج من الدين من باب التفريط والتهاون لحد ما تترك الدين بالكلية، ونفس تانية عندها همة عالية بتميل إلى التشدد والتمسك والتسلط، فيدخل لها من الباب ده، يعني فيه ناس مش متصورة النقطة دي، الناس معتقده أن الشيطان بس يوسوس لك أنك تبعد عن الطاعة لا، ده أحياناً الشيطان يوسوس لك أنك تزود على نفسك زيادة عن اللزوم لطاقة أنت لا تطيقها، تعجب بنفسك وتنقطع بعدها ومنتحملش بعد كده، ربنا لا يكلفك فوق وسعك أنت بتكلفها فوق وسعك ليه؟ فيخرج من الدين من باب الإفراط والتشدد.

فمطلوب منك **"وَكَذَلِكَ جَعَلْنَاكُمْ أُمَّةً وَسَطًا لِتَكُونُوا شُهَدَاءَ عَلَى النَّاسِ"** البقرة: ١٤٣، دون إفراط ولا تفريط فلو عايز تثبت على الطريق الصح افتكر أن خير الهدى؛ هدي محمد -صلى الله عليه وسلم- من غير إفراط ولا تفريط.

يجب أن نحذر كل الحذر من محقرات الذنوب

من مداخل الشيطان برضه المشهورة أوي واللي فعلا الواحد مبينتبهش ليها والنبي -صلى الله عليه وسلم- حذرنا منها -عليه الصلاة والسلام-، فقال: **"إياكم ومُحَقَّرَاتِ الذُّنُوبِ، فَإِنَّمَا مِثْلُ مُحَقَّرَاتِ الذُّنُوبِ كَمِثْلِ قَوْمٍ نَزَلُوا بَطْنَ وَادٍ، فَجَاءَ ذَا بَعُودٍ، وَجَاءَ ذَا بَعُودٍ، حَتَّى حَمَلُوا مَا أَنْضَجُوا بِهِ خَبْرَهُمْ، وَإِنَّ مُحَقَّرَاتِ الذُّنُوبِ مَتَى يُؤَخِّدُ بِهَا صَاحِبُهَا تَهْلِكُهُ"** صححه الألباني، أن المحقرات دي يعني بالنسبة لك هو ده ذنب أصلاً؟! ده ذنب صغير ده عادي ما تسلم عادي، ما تعمل فرح عادي، ما تلبس شيش الحجاب عادي، بقى ده العادي، النبي -صلى الله عليه وسلم- قال هيهلك بهذه الذنوب الصغيرة ربنا -سبحانه وتعالى- قال في سورة النور: **"وَتَحْسَبُونَهُ هَيِّنًا وَهُوَ عِنْدَ اللَّهِ عَظِيمٌ"** النور: ١٥، فهو ممكن يكون عندك أنت من المحقرات ولكنه عند ربنا -سبحانه وتعالى- ذنب عظيم جداً وكلنا حافظين الحديث المرآة اللي حبست الهرة ذنب احنا شايفينه صغير، وإن الرجل ليتكلم بالكلمة لا يلقي لها بالاً.

وحديث أن النبي -صلى الله عليه وسلم-: "مَرَّ رَسُولُ اللَّهِ صَلَّى اللَّهُ عَلَيْهِ وَسَلَّمَ بِقَبْرَيْنِ جَدِيدَيْنِ، فَقَالَ: إِنَّهُمَا لِيَعْدَبَانِ، وَمَا يَعْدَبَانِ فِي كَبِيرٍ، أَمَا أَحَدُهُمَا فَكَانَ لَا يَسْتَنْزَهُ مِنْ بَوْلِهِ، وَأَمَّا الْآخَرُ فَكَانَ يَمْشِي بِالنَّمِيمَةِ" صححه الألباني، كلها حاجات صغيرة ولكنها محقرات الذنوب، ومشكلة محقرات الذنوب دي في عرض الفتق على القلوب، فالنبي -صلى الله عليه وسلم- قال: فأيا قلب أشربها نكتت فيه نكتة سوداء يعني إيه؟ علامة سوداء، فهو الذنب الصغير ده ربنا قال بيعمل علامة سوداء في القلب، ذنب كمان صغير علامة سوداء في القلب، علامة سوداء في القلب، حد ما القلب و-العياذ بالله- بقى قلب لا يتبع أي شيء إلا ما أشرب من هواه زي ما النبي -صلى الله عليه وسلم- قال، فمحقرات الذنوب مدخل رهيب جدًا جدًا للشيطان ومن الحاجات اللي بتوقع الناس دايماً، وتجرح القلوب في رحلة السير إلى الله -عز وجل-.

احذر أن تعاقب في دينك وإيمانك

ابن القيم -رحمه الله- له كلام رائع في الباب ده قال: "الذنوب جراحات، ورب جرح وقع في مقتل" يعني أحياناً واحد الشيطان يتسلط عليه ويخليه يسقط تماماً ويترك الطريق بسبب ذنب، يعني لما ربنا -سبحانه وتعالى- تكلم في سورة آل عمران قال -تعالى-: "إِنَّ الَّذِينَ تَوَلَّوْا مِنْكُمْ يَوْمَ الْتَقَى الْجَمْعَانِ إِنَّمَا اسْتَزَلَّهُمُ الشَّيْطَانُ بِبَعْضِ مَا كَسَبُوا" آل عمران: ١٥٥، فاحذر زي ما كان ابن الجوزي يقول: "الواجب على العاقل أن يحذر مغبة المعاصي" مغبة يعني عاقبة المعاصي "فإن ناراها تحت الرماد"، يعني هو مش شايف النار، فهو ممكن فجأة يُعاقب وتكون العقوبة تنزل في دينه، في إيمانه، زي القصة في سورة الأعراف قال -تعالى-: "وَأْتَلُ عَلَيْهِمْ نَبَأَ الَّذِي آتَيْنَاهُ آيَاتِنَا فَانْسَلَخَ مِنْهَا فَاتَّبَعَهُ الشَّيْطَانُ" الأعراف: ١٧٥، هو انقض عليه لأن هو مستني اللحظة اللي هو هينسلخ فيها، فالإنسان يحذر من خطورة المعاصي لأنها ممكن تكون من أسباب سقوط العبد.

مشكلة الانغماس الزائد في الدنيا

الحاجات اللي تمس الواقع برضه جدًا بالذات الواقع اللي احنا عايشينه الأيام دي، موضوع الانغماس في الدنيا، أن واحد طول النهار بيشتغل وممكن يشتغل شغل أوفر تايم بعدها، من شغل لشغل لشغل، هو ممكن مبيعلمش حاجات حرام، لكن هو بعد فترة من كتر ما انغمس في الدنيا وبقي حريص على الدنيا، للأسف بي فقد دينه، النبي -صلى الله عليه وسلم-، في حديث جميل أوي قال: "ما ذئبان جائعان أرسلا في غنم، يعني تخيل غنم موجودة وفيه ذئبين في وسط الغنم وكمان جعانين وأرسلا في الغنم، تخيل هيفسدوا إزاي، فالنبي -صلى الله عليه وسلم- قال: بأفسد لها من حرص المرء على المال والشرف لدينه" صححه الألباني، يعني واحد حرصه على المال وانغماسه في الدنيا وتشتت ذهنه للأسف ده بيسفد دينه ويبضيع عليه دينه.

يجب أن يكون هناك خطوط حمراء في العبادة لا تقل عنها

فالحل إن لازم يكون له خطوط حمراء، لازم يكون له خطوط حمراء في العباد مينزلش عنها أبداً، ولو نزل عنها أنت كده بتفقد دينك، أنت كده بتبيع دينك بدنيتك، لازم أن يحاول أن يحول بيئة شغلة لبيئة إيمان بيزيد فيها إيمانه، ويحاول يغير فيها، لازم يكون مثلاً الأوقات اللي بيفضى فيها، زي يوم الجمعة، يحرص أن يوم الجمعة لازم يكون فيه محطة شحن، يحضر مثلاً خطبة جمعة مؤثرة مش أي خطبة وخلص تحت البيت وخلص، يروح ويسافر، مثلاً بنت مثلاً مشغولة في الدراسة طول الأسبوع مثلاً أو بتشتغل ومشغولة يبقى لازم يكون يوم الإجازة ده لازم يكون محطة شحن في حياتها.

يجب استغلال أوقات الفراغ في الذكر

أحياناً الناس فعلاً بتبقى ظروف شغلها صعبة، فاحنا ممكن ننصح نصيحة حتى الشباب في الجامعة واللي بيشتغل استغلال البيّنات يعني وأنت في الطريق للجامعة، وأنت في الطريق للشغل، شغل درس، راجع حفظك للقرآن، أنت خلاص جاتلك فرصة فاضي، يبقى أنا مركز أي فترة بينية في اليوم، قدرت أقعد في المسجد من المغرب للعشاء، قدرت أقعد من الفجر للشروق، يبقى أنا عندي محطات يومية في البيّنات أستغلها.

الشباب اللي في القاهرة مثلاً، احنا بيبقى عندنا المسافات طويلة جداً ومدد طويلة في الزحام، أنت لو اتعود بدل ما أنت قاعد مشغل بتسمع أغاني قاعد بتضيع الوقت في أي حاجة وخلص طب ما تخلي فيه سلاسل معينة، أو الكتب المسموعة، والكتب الصوتية.

تعلم منهج أحب الأعمال إلى الله أدومها وإن قل

النبى -عليه الصلاة والسلام- قال: "أَنَّ النَّبِيَّ صَلَّى اللَّهُ عَلَيْهِ وَسَلَّمَ كَانَ يَخْتَجِرُ حَصِيرًا بِاللَّيْلِ فَيُصَلِّي عَلَيْهِ، وَيَبْسُطُهُ بِالنَّهَارِ فَيَجْلِسُ عَلَيْهِ، فَجَعَلَ النَّاسُ يَتَوَبُّونَ إِلَى النَّبِيِّ صَلَّى اللَّهُ عَلَيْهِ وَسَلَّمَ فَيُصَلُّونَ بِصَلَاتِهِ حَتَّى كَثُرُوا، فَأَقْبَلَ فَقَالَ: يَا أَيُّهَا النَّاسُ، خُذُوا مِنَ الْأَعْمَالِ مَا تُطِيقُونَ، فَإِنَّ اللَّهَ لَا يَمَلُّ حَتَّى تَمَلُّوا، وَإِنَّ أَحَبَّ الْأَعْمَالِ إِلَى اللَّهِ مَا دَامَ وَإِنْ قَلَّ" صحيح البخاري.

على فكرة احنا بنسمع الحديث إننا دايماً يبقى لازم نعمل عمل قليل، لا، يعني ممكن أنت تكون همتك ونفسك وإيمانيتك تجيبك في عمل كبير مستمر، مفيش مشكلة، لكن أحب الأعمال أدومها وإن قل ده منهج، إن أنا أداوم على ورد أحسن ما أنا أسخن في يوم واقراً لي جزء وبعدين انقطع شهر، لا، داوم صفحتين في اليوم، يقول لك لا أنا بقرأ أكثر من كده، زي ما سيدنا عبد الله بن عمرو، قال يا رسول الله أقدر، يقولوا طب صوم بس يومين، يقول له أستطيع أكثر من كده، قال له صوم يوماً وأفطر يوم، في الآخر سيدنا عبد الله بن عمرو قال إيه لما كبر في السن، وكان يكره أن هو فيه حاجة معينة فارق عليها أن النبي -صلى الله عليه وسلم- أن هو يخالف، شوف الأدب، قال يا ليتني أخذت رخصة النبي -صلى الله عليه وسلم-. فاتعلم المنهج ده إن أنت أحب الأعمال إلى الله أدومها وإن قل.

اجعل أعمالك كلها متتالية حتى لا تغفل

الحاجة الثانية لما تعمل طاعة كبير متخليش الطاعة دي تخليك تريح، النبي -عليه الصلاة والسلام- في أوائل ما أنزل قيل له: **"فَإِذَا فَرَغْتَ فَانصَبْ"** الشرح: ٧، خلصت عبادة تنصب وجهك لعبادة ثانية على طول مترجش، احنا عندنا إيه، أنا عملت خلاص كفاية كده، أنا عملت النهاردة حاجات كتير أوي فهريح بقى، لا مترجش، الراحة هتخليك تنام، المؤمن إذا ارتاح غفل.

لا يجب أن نسيء الظن بالله -سبحانه وتعالى-

من الحاجات المهمة أوي اللي بنستصحبها موضوع حسن الظن بالله -سبحانه وتعالى-، لأنك أنت هتقابل حاجات كتير في الطريق ده، هتقابل ابتلاء، هتقابل فتور، هتقابل حاجات كتير جداً، لازم تبقى مُحسِن الظن بالله -سبحانه وتعالى- أن ربنا يريد لك الخير، **"وَاللَّهُ يُرِيدُ أَنْ يَتُوبَ عَلَيْكُمْ"** النساء: ٢٧، **"يُرِيدُ اللَّهُ أَنْ يُخَفِّفَ عَنْكُمْ"** النساء: ٢٨، ربنا والله لا يريد منك إلا الخير، لا يريد غير أنك أنت تتوب، لا يريد غير أنك أنت تمشي في طريقه -سبحانه وتعالى-، فأحياناً ممكن واحد يقع في معصية، يقول لك أصل أنا ربنا مش عايزني، هو فعلاً ربنا مش عايزك لأن ربنا مبيعوزش، ربنا يريد العوز ده من الحاجة، هو ربنا يريد أن هو يتوب عليك، لكن ده أنا ربنا مش كاتبلي إن أنا أمشي في الطريق ده، أنا ربنا مش كاتب لي إن أنا أبقى كويس، يا عم لا والله ده من سوء الظن بالله -سبحانه وتعالى-، وده من اللي الشيطان بيعمله بيخليك تسيء الظن بالله -سبحانه وتعالى-، ربنا -سبحانه وتعالى- كل حاجة في حياتك كانت خير منه -سبحانه وتعالى-، هو أنت عمرك شفت منه شر أصلاً، ولا عمرك شفت منه حاجة وحشة عشان تيجي لدي وتقول لا أصل ربنا أراد بيا كذا، فمهم أوي حسن الظن.

الانتكاس بعد الإيمان

عشان كده ربنا -سبحانه وتعالى- يقول في الحديث القدسي: **".. أنا عند ظنّ عبدي بي إن ظنّ خيراً فله وإن ظنّ شراً فله"** صحيح ابن حبان، فأنت هتظن بربنا إيه في الطريق؟ لو هتظن به خير هتلاقي ربنا بيفتح لك، وهو هتظن فيه عكس ده و-العياذ بالله- هتلاقي فيه حاجات ثانية مش عايزينها.

من الآيات اللي تدبرت فيها أثرت فيا أوي، قول الله -تعالى-: **"وَلَا تَكُونُوا كَالَّذِي نَقَصَتْ غَرْهَا مِنْ بَعْدِ قُوَّةٍ أَنْكَانًا"** النحل: ٩٢، لما تيجي تشوف التفسير؛ الناس اللي بيعملوا حاجات التريكو شوف فعدت أد إيه ومدة وبعد ما هي بذلت مجهود كبير جداً جداً بمنتهى البساطة قاعدة بتفكك تاني، ليه؟ تشبيهه صعب أوي في القرآن من الله -سبحانه وتعالى- لي بينتكس بعد الإيمان.

لمن ينتكس اسأل نفسك سؤال هل هان عليك إلزامك؟

أحياناً لما بيبقى شاب معين بياخذ قرار أنه خلاص هيترك الطريق، أو بنت معينة هتاخذ قرار أنها تترك الطريق، بتبقى بتسمع بس صوت الشيطان اللي بيسهل عليها هذا الأمر، وبيزين لها الترك وبتنسى ذكريات مهمة جداً جداً، فأنا عايز أقول حاجة دائماً بترن في أذني أنا شخصياً وعايز أذكر نفسي وأذكركم بيها وكل شاب أو بنت بيسمعونا دلوقتي، سؤال

مهم أوي أوي، لكل شاب خلاص وهو واقف كده قدام المرأيا، ويقرر خلاص أن هو هيقول لحيته أو بنت خلاص واقفة قدام مرأيتها ويتكرر أنا هنزل النهاردة من غير حجاب، احنا عايزين نسأل سؤال وإن كان طبعا الانتكاس أكبر وأعمق من كده بكثير وإن كان ده يبقى المرحلة الظاهرية الأخيرة بعد فترات طويلة من الانتكاس السابق لكده، عايزك تفتكر كلمة واحدة بس ترن في أذنك الثانية غير اللي شيطان بيوسوس لك، يا ترى هان عليك، عايزك وأنت بتبص في المرأيا عايزك تفتكر لحيته دي مثلاً اللي نبتت شعرة شعرة، ومشاكل مع الأهل، ومشاكل في الشغل وسيبته واتبهدت واتعدبت، افتكري أهلك وأد إيه كنتِ طب الله يخليك يا ماما، طب بالله عليك اقنعي بابا طب والله هعمل كذا.

تذكر طريقك في الالتزام والتضحيات التي بذلتها

والتضحيات والمشاكل والحاجات اللي حصلت وفرحتها والناس بتبارك لها لما اتحجبت أو انتقبت، عايزك تفتكر عهدك مع الله -سبحانه وتعالى- لحظة توبتك هان عليك عهدك مع ربنا -سبحانه وتعالى-؟ هان عليك عهدك وعودك مع ربنا -سبحانه وتعالى-؟ هان عليك كل اللي أنت عملتية في رمضان، هان عليك كل الخطوات اللي أنت طلعتها وخذتها في الطريق، والمعاصي اللي أنت سببتها؟ هان عليك النبي -صلى الله عليه وسلم- وسنته، وكل اللي أنت سمعته ومكنتش عارفه قبل كده، بمجهود النبي -صلى الله عليه وسلم- في دعوتك وإزاي شاف قمة العذاب عشان الدين يوصل لك وتتعلم الكلام ده بسهولة، هتفرط في كل ده؟ هان عليك علاقتك بالنبي -صلى الله عليه وسلم-؟ هان عليك فرحته بلقائك على الحوض أنه يفرح بيك، ويفرح باتباعك لسنته وهي تفرح بأنك تبقي مع أمهات المؤمنين، هان عليك مصحفك، فاك مصحفك اللي أنت كنت بتأخده معاك وتحطه في شنطتك أو في جيبك أو على موبيلك، ويبقى لك ورد وأنت بتتعلم تجويد وجلسات التجويد، وجلساتك مع شيخك أو جلستك مع محفظة القرآن والجلسة وصحبتك في الجلسة، واللي ربنا أبدلك بدل صحبتك السيئة اللي أنت سببتها ربنا أبدلك بصحبة صالحة، هان عليك الكلام ده كله ليه؟

هل المعصية تستحق أن تخسر كل هذا؟

هان عليك صحباتك اللي أنت كنتِ سبب في التزامهم وسبب في أن ناس كثير منهم بدأو يصوموا من بوستاتك، وبدأو ياخدوا خطوات بسببك، هان عليك كل اللي أنت عملته في الطريق؟ وافتكر بعد كلمة هان عليك، أيه اللي يستاهل؟ معصية إيه اللي تستاهل أن كل الخطوات اللي أنت أخذتها في الطريق لربنا دي تروح، قصاد إيه؟ أي شهوة أي لحظة معصية للذة معينة تترك كل ده، افتكر ميزانك يوم القيامة، هل كل الخير اللي أنت عملته ده يستحق أن هو يطيش أمام هذه المعصية؟ لا والله أبدًا، والله ما في أي حاجة في الدنيا تستاهل أن كل ما فتح الله عليك به أنه يروح قصاد أي معصية، وافتكر والله يا جماعة أي حد يقول لك هو ممكن يكون حد عرف ربنا بجذ وانتكس، قال أحد السلف: لا والله، والله ما وصل أصلاً ولا عرف أصلاً، لأن أنا مؤمن إيمان شديد جدًا أن مستحيل إن أي إنسان أو إنسانة يعرف ربنا بجذ ويوصل لربنا بجذ، ويدوق القرب بجذ، ويعرف يعني إيه علاقة برنا -سبحانه وتعالى- بجذ عمر ما حد يدوق المعاني دي ويرجع عن طريق ربنا ده تاني.

ماذا تفعل حيال إدمان نفسك وإقبالها؟

اللي فعلاً وصل لربنا بجد وذاق حلاوة القرب، ربنا -سبحانه وتعالى- بحسن الظن ربنا بيثبتته، ربنا -سبحانه وتعالى- يقول للنبي -صلى الله عليه وسلم-: **"وَلَوْلَا أَنْ ثَبَّتْنَاكَ لَقَدْ كِدْتَ تَرْكُنْ إِلَيْهِمْ شَيْئًا قَلِيلًا"** الإسراء: ٧٤، الثبات من عند ربنا -سبحانه وتعالى- وزى ما احنا قلنا مسألة الدعاء، ومسألة حسن الظن بالله، مسألة أن أنت تاخذ خطوات ثابت عليها وتفرق ما بين الفتور وما بين الانتكاس، وتبعد عن الانتكاس وتحاول تعالج الفتور، ده كان فهم الصحابة لمسألة الفتور والثبات والتعامل معها، شوف كده أثر سيدنا علي بن أبي طالب لما كان يقول: **"إن للنفس إقبال وإدبار، فإذا رأيت من نفسك إقبالاً فزد من النوافل، أو فزد في الطاعات، وإذا رأيت منها إدباراً"**، خلاص الدنيا واقفه معاك، **"فألزمها بالفرائض"**.

وسيدنا عمر بن الخطاب جابها من ناحية القلوب، نفس الأثر بس **"إذا رأيت من قلبك إقبالاً فأكثر من الطاعات وإذا رأيت من قلبك إدباراً فالزمه الطاعة أو فالزمه الفريضة"**، احنا عايزين نقول إيه في لولا أن ثبتناك، أن الثبات من عند ربنا -سبحانه وتعالى-، وإن احنا فعلاً مش هنقدر نكمل في الطريق لربنا غير برينا، واللي وصل لربنا ميتخافش عليه، لأن ربنا -سبحانه وتعالى- هو اللي هيثبتته.

تم بحمد الله

شاهدوا الدرس للنشر على النت في قسم تفرغ الدروس في منتديات الطريق إلى الله وتفضلوا هنا:

<http://forums.way2allah.com/forumdisplay.php?f=36>